

► *Proyecto di Museo Historico Arubano:*

'Trece un pida historia pa Museo'

ORANJESTAD

Diadomingo 24 di Februari, for di 10'or di mainta pa 4'or di atardi lo bai tin un actividad special na Museo Historico Arubano den Fort Zoutman.

Ya ta pa varios luna cu un grupo di trabao ta trahando riba un exposicion permanente nobo pa e museo aki. E grupo aki ta consisti di Karel Goedgedrag y Helen Lampe di e museo mes. Drs. Aluc Alofs y Kees de Jongh, docentenan di Instituto Pedagogico Arubano (IPA). Drs. Raymundo Dijkhoff y mr. Arminda Ruiz (Bsc) di Museo Arqueológico y Gloria Croes di Instituto di Cultura.

Pa haci e parti di diseño di e exposicion a aserca Leo Helms di Museo Kura Hulanda di Corsow. Coordinacion di e trabaonan tecnico ta den man di Earon Matthew.

A traha riba e plan di contenido di e exposicion cu lo enfoca riba e periodo promer cu yegada di e refineria di Lago na 1924.

E tres salanan di e museonan lo trata un resumen di prehistoria te historia moderno; e bida di ciudad y e bida den cunucu. Topiconan cu lo resalta ta forma di biba (e.o. arquitectura), economia (e.o. comercio, agricultura/pesca, artesanía), educacion y expresionnan folklórico.

Pa ilustra e informacion na un manera visualmente atractivo a cuminsa pa haci un inventario di e coleccion di Museo Histórico. Un gran cantidad di obheto y artefacto duná na e museo den transcurso di añanan lo wordo usa den e exposicion nobo.

Sin embargo ta sinti e necesidad pa pidi publico en general pa aporta na e coleccion aki. **Riba Diadomingo, 24 di Februari** ta invita tur esnan cu por tin obheto, potret, documento of algo otro cu ta conta un tiki di historia di nos pais.

Preferencia di e grupo di trabao ta bai pa obhetonan cu ta di e periodo promer cu 1950, pero publico ta liber pa trece obhetonan cu den nan concepto lo por ta interesante pa e futuro exposicion permanente di Museo Historico.

Personanan cu trece obhetonan lo mester ta



Foto Bon Dia Aruba

Esaki ta e grupo di trabao 'Remodelacion exposicion Museo Arubano' durante nan conferencia di prensa siman pasa.

dispuesto pa duna esakinan den 'bruikleen' na e coleccion di e museo. Mas cu claro cu tur e obhetonan lo wordo catalogiza na e momento ey y e persona lo

haya un comprobante cu e tin un obheto den coleccion di museo.

Mester haci mencion di e hecho cu e proyecto di

remodelacion di e exposicion di Museo Histórico ta wordo financia pa UNOCA. Ademas e ta conta cu sosten di Minister di Cultura y di e grupo di trabao

di museonan. Pa cualkier pregunta, por yama Museo Historico na tel. 826099 of 885199.